

四庫全書

集部

欽定四庫全書

集部

茶山集卷二

詳校官石中允_臣薩敏

主事_臣呂雲棟覆勘

總校官編修_臣王燕緒

校對官修撰_臣吳錫齡

謄錄監生_臣張元功

欽定四庫全書

集部四

茶山集

別集類三 宋

提要

臣等謹案茶山集十卷宋曾幾撰幾字吉甫
贛縣人徙居河南以兄弼卹恩授將仕郎試
吏部優等賜上舍出身授校書郎高宗朝歷
官江西浙西提刑忤秦檜去位僞寓上饒茶
山寺自號茶山居士檜死召為秘書少監權

禮部侍郎提舉王隆觀致仕卒謚文清陸游
為作墓誌云公治經學道之餘發於文章而
詩尤工以杜甫黃庭堅為宗魏慶之詩人王
屑則云茶山之學出于韓子蒼其說小異然
韓駒雖蘇氏之徒而名列江西詩派中其格
法實近于黃殊塗同歸實亦一而已矣後幾
之學傳于陸游加以研練面目畧殊遂為南
渡之大宗詩人王屑載趙庚夫題茶山集曰

清于月白初三夜淡似湯烹第一泉咄咄逼人門弟子劍南已見一燈傳其句律淵源固灼然可考也又游跋幾奏議稿曰紹興末先生居會稽禹跡精舍某自勅局歸無三日不進見見必聞憂國之言先生時年過七十聚族百口未嘗以為憂憂國而已据此則幾之一飯不忘君殆與杜甫之忠愛等故發之文章具有根柢不得僅以詩人目之求諸字句

間矣墓誌稱有文集三十卷易釋象五卷易
釋象已不傳文集則書錄解題及宋史藝文
志均作十五卷是當時已佚其半自明以來
并十五卷亦佚僅僅散見各書偶存一二茲
從永樂大典中搜採編輯勒為八卷凡得古
今體五百五十八首雖不足盡幾之長然較
劉克莊後村詩話所記九百一十篇之數所
佚者不過三百五十二篇耳殘膏賸馥要足

沾丐無窮也乾隆四十五年九月恭校上

總纂官

臣

紀昀

臣

陸錫熊

臣

孫士毅

總校官

臣

陸費墀

欽定四庫全書

提要

欽定四庫全書

集部四

茶山集目錄

別集類三 宋

卷一

五言古詩三十二首

卷二

五言古詩四十六首

卷三

七言古詩三十一首

卷四

五言律詩一百二十八首

五言排律五首

卷五

七言律詩八十二首

卷六

七言律詩六十四首

卷七

五言絕句五十三首

六言絕句七首

卷八

七言絕句一百十三首

欽定四庫全書

茶山集卷一

宋 曾幾 撰

五言古詩

尋春次曾宏甫韻

案曾宏甫名惇避宋光宗諱以字行紆之子輩之姪孫陳振孫

書錄解題曾氏三望最初溫陵公亮次南豐輩兄弟其後則幾之族集中贈宏甫必冠以曾蓋以明

同姓不

宗之意

春山數峯青春水一溪綠幽尋山水間物物可寓目花

香若三薰柳色若新沐吾儕幸閒放晴晝頗連屬胡為
深閉門終日仰看屋嘉招儻亟拜豈敢憚僕僕請君攜
壺去政恐日不足小槽雖蜜甜何必待醪醖茗事姑置
之雷車困枵腹宏甫詩有家貧只舊醕不辦樽中醪但
煮官焙香炊飯鱸魚腹之句且云家釀
甜甚不堪
饗客也

次范益謙遷居九江經過上饒見贈韻

君為九江行意有風雨快維舟玉溪畔未割故人愛停
杯一問我請以所聞對九江萬事好賞詠看前輩巖巖

匡俗廬

案後漢書郡國志注釋慧達廬山記畧有匡俗先生出殷周之際隱居此山時謂所止為仙人

之廬而命焉又案豫章舊志匡俗字君平夏禹之苗裔也原本避宋太祖諱作正俗今校改

頂踵極

高大其中藏曲折願勿遺瑣碎煙波湓浦游風月庾樓

會以茲供筆硯安得有蕪累矧若著幽禪直欲入三昧

飽參山南北母問人顯晦歸來亦何云聖處果何在要

知方策間即有文字外我今如是說初不墮荒怪屋漏

實臨之斯言尚無愧

次陳少卿見贈韻

少卿令德公不肯入州府種花養風煙藝木蔭庭宇了

無適俗韻真可與晤語永懷君詩句

少卿詩說往時行朝以雪句唱和

淨洗我塵土如何百里間此秘欠未覩今晨款荆扉老

氣壓方虎新詩疾雨風妙字列行伍華宗有后山句律

嚴七五豫章乃其師工部以為祖君方討淵源奚啻窺

牖戶我貧無一錢不敢學農圃空餘數卷書腸腹自撐

拄

陳卿又和三首而仲通判亦三作嚴教授再賦皆

有見及語予不可以無言故復次韻

官屬遽中書朝班高太府

陳卿貳太原府兼中書檢正

陳卿掉臂去

偃仰一茅宇臨池看魚樂坐樹聽鳥語脩竹手所栽
萌爭上土天開重新運聖作萬物覩會合如風雲吹噓
者龍虎陳卿落閒處問孰與為伍毛穎傳中人渠儂適
成五詩章出咳唾流派考宗祖仲嚴更獻酬曾次非小
戶覽觀不暇給爛若花藥圃可畏韻險艱浮梁裊相拄

案此句用杜甫龍門閣詩
全句原本裊誤案今改正

沈明遠

作詰

教授用東坡仇池石韻賦予所蓄英

石次其韻

維南有絲溪溪石如水綠膽相百里間抱負一夫足聲
名作災怪攻取及背腹在者畧無奇溪神為顰蹙蠻煙
瘴雨地故舊實州牧坐令數峯青飛過大江瀆何嘗說
向人恐類和氏玉公然遭奪攘不使得藏伏廣文到吾
廬索隱妙著卜東坡韻險艱句句巧追逐幽人所好山
已占一林谷又兼小崢嶸無乃太多欲端如耐久朋相

與會心曲大勝輕薄兒浮雲變何速

次綠字韻

舍前南山青舍後北山綠捫蘿涉其巔策杖遶其足中
間奇絕處表裏見心腹登臨豈不佳老境日以感誰知
怪石供能坐我郊牧政應索幽遐何憚越川瀆嶽嶽庾
嶺南美者色蒼玉賞音無東坡尤物多跼伏

仇池嵩南石也

年致書求屢以可否卜故人為遣送健步遠相逐雖非
古仇池要是好崖谷似為天所矜此段獨從欲深慚昇

致重路轉知幾曲安得滄海神鞭咎使之速

還守台州次陸務觀贈行韻

蟬噪高柳岸鷺飛遠沙汀蕭然感予懷清靜游神庭老
樹失故綠殘芳謝微馨胡為趣召節日日晨昏星放纜
西興渡落帆浙江亭恭惟陛下聖萬國瞻儀刑黼座懸
日月孤燈耿熒熒况復如許病自知不能廷所以乞閒
散庶幾守沈冥方虞秋霜嚴翻得春露零再聞芸草香
一洗海物腥父老喜我來無異化鶴丁兒童喜我來小

駟騎青青諒有隔生契不然定誰令四海習鑿齒幾年
讀書螢新詩中律呂雖美無人聽鳴聲勿浪出坐待軒
皇伶

次折仲古避寇潯州韻

我持十口家不辦一葉船賊聲日夜急欲濟江無邊身
雖墮胥井仰視猶有天天理儻未爽偷兒浪垂涎洗心
占羅池稽首依靈泉竟以妻子免百神果昭然得從潯
江遊未斷龍城緣為問米何如買禾可論麀向來魚菜

市十戶八九旋令我喜折屐喜定翻悲憐王師靜江南
趨者人摩肩一日百回首我非強項宣盛欲徑梅庾不
然傍柳連終鮮孔方兄留滯等謫遷尚念吾鼻祖永懷
舊山川往還武城居家風到今傳我方尋昨夢一舸百
竿牽而公下劈箭

案劈箭二字見韓愈岳陽樓詩原本箭誤剪今改正如駟駿得

鞭江村索居地未敢高枕眠世事公等在歸與有逢年

次雪峯空老韻二首

雪峯僧中龍此道誰與共蕭然兩伽陀不舉似大眾獨

貽茶山老以當蒲塞供巖花與澗草信手拈來用
獨烹茶山茶未對雪峯雪須知千里間只共一明月陳
家參玄人道眼應一瞥為語管城君相從熾然說

贈疎山清老

江西草堂清道價直寰宇中分死心坐親飲晦堂乳與
人作陰涼雨後散煩暑千林搖落後鬱鬱松柏古龐頭
覆霜雪碧眼照針縷貫穿禪家流領略我輩語居山專
論道餘事百不覩人言師疎慢我但見媚嫵去年瀟湘

來叢席歷幾所踞堂號知識說法若雲雨陰求乃翁事
未見一人舉請師長住世此道要盟主杖拂有餘閒時
時入州府

贈空上人

我拳空門秀得之古疎山斯人器玉壺中有寶月寒四
壁澹相對安身一蒲團玲瓏六牕靜竟日心猿閒時從
禪郎起游戲于筆端當其參尋時恣意雲水間松風漱
齒頰蘿月入肺肝政使不學詩已見詩一斑況復用心

苦俗氛何由干今晨出數篇秀色若可餐清妍梅著雪
圓美珠走盤乃知心鏡中萬象紛往還皆吾所現物摹
寫初不難誰能效我輩造語出險艱請師賸汲古淨洗
蔬腸酸坐令韓退之收斂加巾冠

送秘丞羅庭揚

孝芬

將漕湖北

湖南八九州海內清絕地與公白雞年

案白雞年謂酉
歲本晉書謝安

傳

接翼鴻鴈使高堂親八十無復遠遊意奉承萬事了

趨走三節至詔書引上殿帝曰汝國器置之蓬萊山身

亦典中秘乖離如許久會念差足慰胡為未暖席歸與
不可制人生故鄉樂況攬澄清轡皇華遣使臣光采寧
有是紅塵跨鞍馬老矣殊少味著鞭輸公先吾亦從此
逝

贈趙判官壽卿

房齡

二首

身為高帝孫面作寒士氣緣情德麟語寫物大年意青
雲無蘇黃何以致後世牕明几靜間是事且遊戲

得州敢為榮得士乃足詫此郎精琴書不獨妙詩畫雖

云于小道舉不在人下無乃太不廉誰知非譏罵

趙能詩畫

篆隸撫琴

王巖起樂齋

歡悰挽不來愁思推不去達人方寸地固自有樂處得
非山林歟或用詩酒故一朝不在眼便覺少佳趣人言
顏子樂瓢飲映蔬茹何曾夢見渠浪自起欣慕此君與
天游于物初不寓攜持小齋名扁榜隨所住要知真樂
事未省離跬步我亦欲睎顏

案睎顏二字見法言學行篇原本顏誤彥今改正

從君尚能屢

題張彥實舍人墓下湧泉亭

紫薇花底人去作泉下夢佳城閉青春風木號永痛寒
泓孰出之甘冽可抱甕乃知主地神效此清淨供汲引
入中廚色味勝乳湮老龍來試詩事有萬鈞重

程伯禹
龍閣命

名作寄聲松大夫并語石翁仲俱修護持職以遺雲來

用

題盛彥光少府丘壑軒

何許覓丘壑不專在山林胸次儻蕭散市朝有幽尋只
今謝幼輿超然抱遐心俯仰得佳趣何嘗日登臨我雖
非夔曠粗亦能賞音不用一再鼓山高水深深

題黃嗣深家所蓄惠崇秋晚畫

叢蘆受風低積潦得霜淺沙勻洲渚淨水澹鳬鴨遠禪
扉掩晝夜短紙開秋晚欲問此間詩半山呼不返

題程伯禹給事漫吾亭

漫郎專一溪萬事俱不理胡為墮我相名字出奇詭山

林軒冕歟等是寄焉耳程公榜亭意道眼深照此端居
亦偶然小出聊復爾宣城幻事了卻夢歸故里結廬澄
潭上盡室清鏡裏木陰涼夏簟荷氣馥秋水遙岑招不
來為我列牕几昔吾與今吾念念如脫屣心期次山外
人要安石起公勿賦遠遊行應去天咫

題南嶽銓德觀秋聲軒

月明鴈叫遠露下蟬號寒幽幽草蟲泣索索梧葉乾愁
人知秋早聽此良獨難竹君南北美佩服青琅玕天風

一披拂庭宇聲珊珊靈宮蔭老樾別館如深山心淨鑒
止水眼明揖千竿虛籟自然奏有琴不須彈世議大可
厭市聲無少間不如聽君語竟日簾垂間

題臨川宰徐伯章心遠軒

徐侯心萬里身墮百里中政以詩禮庭上有鶴髮翁豈
無敲榜喧不入丘壑胸開軒寄遠韻几淨牕玲瓏竹影
落夏簟水光搖秋空一對鳬鷺行萬里牛馬風悠然見
南山不與俗眼同徐侯歸去來三徑資已豐身將心共

遠勿為督郵恭

春初過王仲禮教授小園

幽居倦孤寂俗駕難追攀相攜筇九節徑造茅三間
王卿貧無事況得獨冷官衡門靜如水委巷深于山
自言學為圃雖小殊可觀始至度略約徐行轉闌干
當階藝紅藥坐待青春還春還未數日草樹猶清寒
殷勤小梅花一笑冰雪顏
煮茗當酒醴言詩替吹彈
君知靜中勝得此良獨難
相戒勿浪出黃塵點人冠

汪惇仁教授即官舍作齋予以獨冷名之

昔君困蠶鹽蓬首牕下讀秋螢屢乾死明月以為燭麻
衣肘欲穿才換一袍綠豈知冷淡債十載償未足書齋
開冰廳敗壁數椽屋橫經綴鵠鷺未省進鳧鶩窮通更
事耳裘扇有反覆直今張羅地便恐車擊轂先生粲可
流示現著冠服從渠勢炙手了不見涼燠小詩應大笑
笑我未忘俗

董令升舍人朋溪圖趙祖文筆也

谷風不須歌朋友道缺絕請歌伐木詩歌罷聽吾說漢
朝儒宗系今代侍臣傑甘泉久論思陽羨小休歇郊園
谷幽幽喬木覆清樾百禽鳴其間相喚極可悅坐令公
感慨朋好苦難結不如侶荆溪迴與世情別淡乎若無
味了不見涼熱是以樂從之諸峯况羅列趙侯有能事
短紙藏曲折更作陶淵明飄飄弄明月

相馬圖呈杜勉齋左司

造物出萬類貴賤伊誰分圭璋雜瓦礫世道同疎親既

收大宛種一掃駑駘羣乃觀相馬圖低首先吟呻千金
購死骨舉國無其真生死何太晚鹽車負艱辛悠悠虞
阪道赤日煎紅塵行人亦何多具眼惟孫君一顧不旋
踵價越連城珍誰為繪此像庸示將來人相馬失之瘦
相士失之貧于茲有鉅公數載居沉淪涵養浩然氣輪
蹄任紛紜素識太平相鶚表飛青雲紫泥日邊下八座
生陽春攄心握文柄引年啟賢門凝睇辨臧否立志安
斯民他時了經濟丹青畫麒麟回顧相馬者細務何足

云寥寥載千古二道非同倫相士今何人少陵身後身

紹興帥相湯公會五客蓬萊閣登望海亭屬某賦

詩

徐稱山朱新仲王
宣子胡周伯及某

赫赫會稽郡潭潭府公居一州勝絕處畢集于庭除秦
望極高秀十峯散江湖蓬萊為收攬遠近爭奔趨溟渤
無百里登臨失東隅翬飛卧龍頂便可窺方壺丞相不
獨饗故人盛招呼兵厨列樽俎賓次羅簪裾傑閣坐褫
帶危亭上肩輿耄倪爭指似還見雲間無一月明白壁

五星燦連珠鄙夫何足數愧汗沾霜鬚客有徐季海題
名數行書怒猊扶石外筋力顏之徒周老盡命駕屬聞
遂懸車何妨行役事政用兒孫扶

陸務觀讀道書名其齋曰玉笈

自生民以來未有夫子盛六經更百代略不覩疵病瞿
眴書角立亦各談性命空門甚宏放果報駭觀聽是以
雖至愚讀者無不敬周時柱下史設教本清靜至今五
十言談若鼓鐘磬雖為二郗詔祇作二何佞遂令黃冠

徒冷落度晨暝賢哉機雲孫道眼極超勝殺青貝多葉
收貯腹中竟慨然發琅函牕白斐几淨三家一以貫不
事類舌競吾皇漢孝文恭己民自定願君益沈涵持以
奉仁聖遠師曹相國下視劉子政

喜得洞霄

乞身知才疎從容荷主聖叫閤如杜宇不謂天亦聽除
書入手來一洗百念靜復疑是夢中驚喜久乃定尚餘
折腰未敗我生塵甑要令襟見肘始與家聲稱今茲火

用事日永南風競林下聽中興姑容老夫病

喜天游二十一兄至毫社時同叔夏十六兄作

登高望南都雉堞疑可數城中人不見百里等燕楚我
無簡書畏自笑誰縛汝東風送兄來下馬逼三鼓迎門
鬧兒童羅拜欣欲舞花枝應亦喜紅幘已微吐聊為文
字飲一洗別離苦別離何足云千載成仰俯要知靜中
趣回視今孰愈焚香默自照下此一轉語鈴閣老師兄
當為君去取

言懷貽寓居

郊居麥風涼佛屋梅雨潤縈簾一炷香隱几百念盡時
從黃卷語坐看青燈燼昏昏花亂眼種種雪侵鬢懷哉
佳友朋久矣闕親近其誰破愁寂令我生鄙吝及閒當
過君請以茗椀進言詩固不能把酒亦無分

坐睡

竹牕納虛明棐几亦滑淨幽人坐清秋倦對古賢聖丹
田閱千息一氣忽空靜豈期黑甜鄉于此得棲徑倒牀

未必佳邂逅乃復勝覺來欠伸餘兩眼半開瞑吾身竟
何許神意久方定從此謝衾帷蒲團日相倩

茶山集卷一

欽定四庫全書

茶山集卷二

宋 曾幾 撰

五言古詩

自越上還信步尋梅

客子千里至未曾款入門妻孥勞苦外徑走江梅村江
梅若有待欲謝花猶存向人一笑粲冷蘂生春溫遶樹
三匝已投空雪飛翻歸來理夢事淡月籠黃昏

鄭侍郎招賞瑞香

浮花雖不多要是乏美質前庭錦烘籠君向何許得色
香極穠麗裁翦極細密複幕重簾開毋令犯風日

晁侍郎折贈芍藥三種

室空無侍者終日延白光今夕果何夕粲者忽在旁得
非散花天來試鐵石腸非羅復非綺何物爲衣裳或濃
若猩血或淺若鵝黃或如淡胭脂薰以百和香竟不可
意解發書問何祥乃知延閣老買得從維揚自不耐渠

惱幽懷可禁當牢辭又不敢熟視徒彷徨吾聞諸古人
物美應獻王呼兒燎沈水持以供虛皇

明秀堂松

堂在柳
州路內

柳侯所為邦十步一遺跡蒼官列前墀相對儼如客邦
人言此松曾及侍侯側風號四百年雪立二千尺江城
閒草木詩卷多採摘柑非往日黃柳是近時碧

子厚手
種柑柳

皆有
詩

同生不同死乃見老氣格尚想哦其間清聲出金

石龍鱗未脫落熊軾幾換易臨民有餘師視此古遺直

種芭蕉

僧牕誰與晤有竹兩三竿栽培費老手方法傳多端朝
朝問無恙暮暮愁其乾調護閱三載今年遽彫殘芭蕉
雖小草長大不作難一身茁茁然萬竅玲瓏間滿中貯
春水烈日何能干以茲陰涼葉代彼青琅玕但恐質柔
脆不堪歲祁寒人生無牢強當作如是觀

詠蠟梅

花時冶遊郎紛若一闌市蠟梅空自芳俗眼不稱意洗

心無一塵坐覺香細細乃知成風斤要斲郢人鼻

吳甥遺靈壁石以詩還之

閒居百封書總為一片石牕中列遠岫所欠者靈壁吳甥手持來知向何許得鏗鏘發金聲溫潤見玉色諸峯掃空翠一水界山白嵯巖出其間如月挂虛碧坐令所珍藏不作一錢直吾雖甚愛之子亦有此癖歸與雲溪旁從汝舊知識欲去復遲遲摩挲遂移刻

何德器贈太湖石

愛山已成癡愛石又成癖徒聞有絲溪時復夢靈壁太湖只在眼曾未收寸碧多自五嶺來仍煩百書索何侯小崢嶸湖水深處得蒼潤波濤餘巉巖鬼神力摩挲復湔洗攘取畏賓客偶然及幽事遣送初不惜俄頃交定盟歡焉慰岑寂奪君書几間坐我洞庭側持還豈人情藏去有慙色苦乏仇池篇如何滿高直

寄崑山李宰覓石

崑山定飛來美玉山所有山祇用功深剏畫歲時久崢

巖出峯巒空洞開戶牖幾書通置郵一片未入手即今
製錦人在昔伐木友嘗蒙委繡段尚闕報瓊玖奈何不
厚顏尤物更乞取但懷相知心豈憚一開口指揮為幽
尋包裹付下走散帙列岫牕摩挲慰衰朽

造姪寄人面毛竹杖四

麥秋氣清和槐夏日陰翳塊然守蓬蒿何以破昏滯肩
輿卒輩乏徒步腳力費出門即林丘散策空夢寐賸為
猶子憐遽以此君至分明人面目刻畫老根柢毛君又

一奇枝幹不少異想應開一束妙簡得三四今晨入吾手夷險可歷試芒鞋與周旋白拂相嫵媚人生七十稀況復已過二多謝汝扶持無乃太晚計

方時敏作寄茶詩允迪趙承之爭論鋒起有以詩碁取決之意二者僕皆不能姑次韻

叢林一轉語矛盾生諸方不知維摩詰衆論付括囊君家富月團入眼驚未嘗勸君勿浪出中有雙龍藏一朝不自秘詞鋒起堂皇詩碁競攻取信美非吾鄉吾鄉亦

何有黍麥紛低昂作詩天所戒但欲身稍昌奕碁正如
詩坐看星垂芒怪君真不蘄顧我俱無長天寒袖手垂
未厭舌本強懸知決戰時兩陣爭堂堂詩壇與碁兵傷
殺亦大當歸去竟何得驚雷轉空腸

即事

朝隨粥魚作夕與棲鳥眠中間復何事野飯炊山田摩
腹步脩廡披襟坐南軒薰爐鬱佳氣茶鼎浮輕烟閒開
竹牕帙靜憩蒲團禪庶幾永白日亦用銷殘年

東軒小室即事五首

卷書坐東軒有竹甚魁偉清風過其間戛戛鳴不已寫之以素琴音節淡如水不惜為人彈臨流須洗耳

鼠跡印塵几蝸涎篆書帷兒童勿除去佳處正在茲人言有何好此段真成癡俗子徒敗意幽懷定誰知

去聖未云遠故在黃卷中孰能領其要直用一理通森羅廢興事瑩若磨青銅使我見萬古敬謝典午公

烹茗破睡境炷香玩詩編問詩誰所作其人久沈泉工

部百世祖涪翁一燈傳間無用心處參此如參禪
有客過丈室呼兒具爐薰清談似微馥妙處渠應聞沈
水已成燼博山尚停雲斯須客辭去趺坐對餘芬

盛夏東軒偶成五首

一堂既虛閒一室可息偃松篁度風清牕戶去日遠幽
禪過亭午涼氣生薄晚間內即妻孥更深遂忘返
攜簟入深竹脫巾挂低枝無令兒輩覺更恐俗客知清
風何故來口詠淵明詩涼冷似太過還從徑巾歸

松風夏逾清竹日午更淨蕭然松竹間得此林壑性異
哉今日暑無復有晨暝疲繭安所逃茅齋入僧定

因病不舉酒況當朱明天客至但茗椀談詩復談禪甘
寒百尺井舊日陸子泉安得僧舍雪霏微濕茶烟

澗蒲上九節不受塵土姿清泉自漂潔白石相因依種
蕉水中央佳處略似之誰能後彫賞惟有歲寒知

友直軒

友義喪來久琢磨復誰能金鉤被采錄絕棄朱絲繩直

哉少稷甫一室清于冰危坐對書帙曲几非所凭日暮
無人來疎籬上寒藤惟有手種竹挺然得其朋風低與
雪重搶地如弗勝政使可斷折天姿諒難凌物或亂真
贗君其別淄澠攘羊而證父是子烏足稱所以貴溫潤
不令見觚稜要我細商略此言有師承

松風亭四首

幾得喬松十餘四合而中空其下可坐故名之云

長卿壁四立杜老茅三重茶山窮次骨憩寂以長松直
幹以棟宇清陰自帡幪山泉落高處審聽是松風

客至引幽步步及松風亭問亭何當作笑視何足聽俗
論關蛙鼃市聲殷雷霆時來一洗耳兩眼為君青

有客過茅宇煮茶坐松風問亭果安在笑指十八公君
看梁與棟豈不深且雄何必用斤斧然後成帡幪

回環數株松老幹極落落清風一披拂竽籟自然作喧
囂世俗事祇使人意惡誰能洗耳來相與憇寂寞

清樾軒

開軒在獨園繞屋得清樾不知何年樹殆為今日設牕

扉落林影時復亂風月喧聲了不聞幽哢極可悅玉溪
僧所廬無似許明潔頗疑三昧手斷取從二浙禪房花
木深此語信佳絕何以落其成爐薰薦茗雪

山房

竹樹轉深徑茶山給孤園禪流打包去舊日單寮存堂
堂十八公不知幾寒溫其誰晤對汝冷落依顏垣有客
占作室此公正當軒風聲落天半似與幽人言已矣復
焉往佳哉略無喧在昔公擇父實惟謫仙孫讀書廬山

中仰視五老尊頭白不歸來高議排金門吾敢效前輩
分應守丘樊何憂蕙帳缺悵望鶴與猿

香寂園

陂陀茶山西草樹無空空呼兒鋤其荒花木亂栽種葩
華以時折薌澤得風送真成摩詰病幻出天女供游人
等蜂蜨晴日競喧哄靈堅不自持玉隴紛一闕誰知根
塵間境界極空洞誠能返其流當見寂不動花飛已無
蹤香過忽如夢于焉自聞聞爾乃得大用

橫碧軒

幾嘗居孔雀僧院東廡小室榜曰橫碧軒有諸公唱酬之作

道山心已灰但有愛山癖移家過溪住政為數峯碧空
濛梅子雨了不見顏色朝來忽獻狀欣若對佳客晴牕
卷書坐葱翠長在側似為神所憐持用慰岑寂會登此
山頭卻望水南北煙樹有無間吾廬應可識

詠南池

衡門久棲遲永日孰與儔既絕車馬喧遂適林塘幽荷
香因雨來水鳥鳴相酬虛懷睨物表可以觀天遊古來

英雄人何異貉一丘茫然不知歸沒世隨波流

遊靈川縣水洞

清溪東南馳礙此碧玉峯蛟龍夜相宅奮迅生雷風
剗開兩貝闕鑿翠成珠宮坐令空洞處一水油然通
泉流百道來投注萬斛鍾不知深幾許湛若鎔青銅
定應天下稀豈但湘南雄嘉興二三子葉舟渺相從
周旋乳蓋底蕩漾菱花中為我告行客無為苦匆匆
小酌清泠淵洗汝塵坌胸

溱浦縣鄧夢授主簿惜日軒

羲和鞭白駒秋日淒已短
向來曬書地欲作炙背暖
鄧侯開西軒東下歌纂纂
前山隱半規悵望支手版
我慵類天賦身世兩不管
著鞭慙祖生運甕謝陶侃
銅壺一百刻夜夢分去半
午牕又為崇長閉讀書眼
勉旃崇明德已事不可緩
作詩非為君實自警疎嬾

溱浦枌木洞蓋神龍所居
今年夏大旱縣官乞取其
水以禱立應民猶以為未
足因作是詩以遺諸

公致再請之意焉

傾心南山雲如渴望梅嶺朝來有佳思挂笏不見頂豐
隆駿奔走列缺元馳騁雨不到人間風伯乃為梗生來
食官倉四海無二頃歌詩視天漢一念極耿耿階前甃
清泉洮頰冰雪冷乾喉欲生煙空下百尺綆幽軒竹三
四柯葉殊秀整邇來頭搶地但懼不得永以斯占稻梁
生意魚在鼎潛蚪民司命膏澤浸茲境邑官樹嘉政責
報甚形影鉅罍走十里豈憚一再請君其潔齋俟百穀

正延頸客子無遠謀空腸望遺秉

詠旱三首

驕陽方施行秋節已樹立田苗在膏肓何道可副急雲
雷不成雨成雨初不濕咄咄逼中秋為霖恐無及

邦人奉教條久不知肉味潭龍不能神土偶安足恃應
真住蘭若雲雨可立致胡不迎之來明明有前事

春雨接梅雨便有水潦憂乞晴今幾日又以憫雨求田
苗雖向槁尚冀什一收政恐穫稻月沛淫不能休

六月十四日大雨連朝

黃金北斗高何似六月雨舉頭看雲霄此祕初未覩今
晨沛然下其勢莫能禦既蠲人鬱陶又長我禾黍誰言
為郡樂病不對樽俎似為神所憐用是娛悅汝緇黃誼
諷誦巫覡亂呼舞惠然從風來茲事一不舉臨民多秕
政何道致如許稽首謝皇天傾心奉明主

七月一日復大雨用前韻

山頭一寸雲山下一尺雨青天在層陰未用遽披覩懸

知壠畝間不著蓑笠禦呼兒趣秧稻喚婦催釀黍使君
同戚休有味勝鼎俎似聞小人言無復怨詈汝行看黃
雲翻不獨翠浪舞飭廚辦千觴飲客醉一舉不知城東
湖今復深幾許鷗鷺莫相疑龜魚且為主

夏雨應祈呈桂帥二首

山椒雲氣佳林表雨聲急元戎郊垌去歸騎旌旆濕老
夫不能陪涼傍竹牕入兒報夕陽明環城碧簪立

牕前有梧桐報我以好雨不眠聽疎滴佳事想農圃苗

根不須問蔬甲已如許小簾六尺牀蕭然睡亭午

寒雨浹旬終不成雪

幽棲又三冬好雪無一片今晨霽同雲薄暮集微霰先
聲乃如許落勢大可見呼兒出門看通夕知幾徧聽牕
復聽竹敲枕不知倦終然成底事寒雨閑深院何嘗憂
瘠田初不辦歡醺囊螢已乾死無以映書卷請天收層
陰斗柄行欲轉愛日上晴軒如披故人面

喜晴

求晴而得晴老子不勝喜夜聞屋瓦聲如疾痛在已通
宵遂無寐落勢殊未已禾頭臥沙泥便恐欲生耳謂天
為不仁春夏雨如彼即今孰主張秋潦更如此垂成又
敗之天意定不爾果如吾所料林杪風忽起玄雲走四
山白日行萬里腰鑱知幾家持杵者誰子歡聲田野間
樂事圖畫裏使君經旬憂枯酒為一洗官倉不須問百
室既盈止作詩告同僚可以賀我矣


初至天台

疇昔所欣慕天台冠坤靈興公妙摹寫粲若披圖經自
憐嬰世網仰愧鴻冥冥夙契諒非淺半生吏金庭成此
一段奇得按東吳刑又分臨海竹想像山圍屏稍稍向
鈴閣行行叩禪扃一丘與一壑所見皆所聆石梁臥劒
戟布水驅雷霆五百大開士神光秘林垌于我定不薄
是事初無形寒岳二隱者在眼誰能青庶幾閭丘守胸
次明渭涇向來石礪耳闕訟終朝聽淨洗塵俗狀數上
參雲亭

聞東湖荷花盛開未嘗一游寄鄭禹功

言登巾子山天外入眼界呀然城之東一鑑如許大得
非所領州其下臨渤澥乃知湖浸闊便覺井邑隘朝朝
橫烏紗暮暮束韋帶何曾官事了祇使人意敗徑須水
清冷一洗胸芥蒂昨來放船好如更宅爽塏四圍純浸
山碧玉亂石黛兼隨鄭廣文入境兩疎快維揚幾同僚
獨喜此翁在只今萬紅妝一一倚青蓋柳陰閒畫舫荷
葉遶公解鬢絲禪榻上句法出蔬菜因之雙鯉魚慎勿

欠詩債



茶山集卷二

欽定四庫全書

集部

茶山集卷三

四

詳校官石中允_臣薩敏

主事_臣呂雲棟覆勘

總校官編修_臣王燕緒

校對官修撰_臣吳錫齡

膳錄監生_臣張元功

欽定四庫全書

茶山集卷三

七言古詩

春晴

青春挽留渠不住白髮拋去吾安能東風送汝一杯酒
從此閉戶真同僧醪醑芍藥待判斷腰鼓橫笛當施行
奈何但效鵲鳩輩竟日討論陰與晴

宋 曾幾 撰

王元渤自湖楚歸贈之

南池荷葉疊青錢
玉山門外君著鞭
南池荷葉成青繖
問君東遊何當返
聞道湖州又楚州
舊隱故鄉宜款款
清晨剝啄叩我門
我不出門非是嬾
不知何物苦相干
能令人熱令人寒
偶然脫命冰炭裏
至今體不勝衣冠
溪流落盡才如帶
想見南池空聚塊
更無小鴨睡枯荷
況有紅妝依翠蓋
眼看物變惜年光
明月黃花盍舉觴
知有中秋恐無分
須君滿意作重陽

贈閻德夫參議

閻公才氣人無敵列星官曹聲藉藉青雲垂上卻回頭
笑說鄉邦富泉石問君功業男兒事禹重寸陰輕尺璧
及身強健不勉旃汲汲東臯恐非策答云種木須十年
種得成陰已頭白是以江濱五畝園拄杖芒鞋日經畫
即今臺榭數十處花竹誰能計千百是中便足了一生
頗覺軒裳總無益我聞此語為驚歎耆境之間真迫窄

案耆境二字不經見攷說文耆
老也又至也蓋言已至耆境

耆者元無三徑可就荒乃知

貧過陶彭澤想君舒嘯東臯上不但淵明心莫逆神交
又得王無功一飯何嘗留俗客未妨獻納雲臺表著繡
畫行尋履跡會當稱是好林塘門對諸峯一區宅

次鄭侍郎臥聞秋風韻

茶山石燥泉亦枯草樹疊疊成樵蘇天公風雷起揮袂
咳唾急雨紛跳珠我詩曾未管窺豹況有文采如於菟
勤公見索掃地無公自瑤碧瑤華琚

再次蘇字韻

秋風不來眼穿枯颯然而至吾其蘇中宵起我燈火讀
音節自喜如連珠不知何物披拂此定是嘯谷之於菟
牕前沉復雨驟作山溜遶屋鳴瑤琚

三次蘇字韻

陶詩雖瘠元非枯確論近出眉山蘇君詩不贈世作者
以暗投我如投珠鄙人摹寫不成就妄指畫狗為於菟
安得才似柳刺史好辭玉珮鳴瓊琚

次程伯禹尚書見寄韻

往年書到西風涼病夫隨牒天一方今年書到玉溪上
暖空白露為清霜人生俯仰成陳迹只有一丘如宿昔

故鄉傑閣公飽山

程所居閣名

野寺幽軒我橫碧

予所寓軒名

名

交曉月長庚星勢交飛絮水上萍往時玉溪二三老死
生貴賤論交情歸來訪舊其誰羨程公筆力猶強健鄭

公霜鬢未成絲掛冠不受兒曹勸

鄭顧道也程詩及之

公于道德

猶耕獵所得不隨天下裂胸中具眼世莫知筆端有口
公能說豹文未省一斑窺戲逐羣兒日課詩詩病無人

與商略滄腸浣胃付神醫

次僧道規蜜蜂去而復集韻

公如老殊所嗜蜜種花山中引蜂入千門萬戶芙蓉房
為公謀食如風狂朝來蜂臣不趨衙一心祝蜂早歸家
歸來喜舞擊銅鉢與人從今莫胡越

吳傳朋出遊絲書求詩

使君官事閒時書略取萬象隨指呼空中遊絲定何物
非蠶所吐仍非蛛光風霽日青春暮惹草縈花細于縷

君今幻出一毫端此秘從來人未覩鈴齋觀者客如雲
有無斷續吁難分不知誰束此毛穎能使字畫纖無倫
嘗聞掃壑生雪白顛草親承擔夫力世間妙處不可傳
心手應時須自得

和劉聖俞顧龍山約客韻

詩筒四出走中涓詩句萬選如青錢曰余借舟期七賢
共嗅梅花咀芳鮮津頭幾度喚長竿晝眠乃若經笥邊
舉頭急雪風中旋瞪視不見山之巔八牕玲瓏繡佛前

同來且結西方緣小軒宛若壺中天玉琴不斷雨聲傳
諾君再宿余敢愆從君索句發春妍

肇慶守鄭子禮以李北海石室碑見寄輒次山谷
老人韻為謝

吾評古法書固自有高下端州遺我石室碑一字千金
恐非價莫邪之劍難爭鋒李公落筆神氣同詩鳴一代
屬山谷草根亦復吟秋蟲

黃嗣深尚書自臨川省其兄嗣文戶部于宜春用

元明魯直唱題李生墨竹梅

紛紛畫手調紅綠好以桃花配叢竹豈無短紙作江梅
雪裏溪邊太幽獨李侯胸中有佳處研滴松煤聊寓目
與梅擇對無可人分付此君真不俗淡煙小雨空濛地
何得月明疎影足始知璀璨出斜枝詩畫古來真一族

東坡梅詩竹間
璀璨出斜枝

探梅

幅巾芒鞋筇竹策踏遍山南與山北雪含欲下不下意

梅帶將開未開色遶樹三匝且復去前村一枝應可摘
丁寧說似水邊人從今日報花消息

許公華遺潘衡墨云其女所造也

潘公之墨東坡訣只今有女能傳業許郎來自大江西
手探玄圭出箱篋摩挲熟視家風在款識明明筆奇絕
見渠顏面得渠心湛如瞳子堅如鐵晴牕大几石泓淨
未忍磨研令小缺冷金玉版姑試之一點清光初漏池
廷珪去人端未遠餘子何勞定優劣健婦果勝大丈夫

從此廬陵是黔歛

款識瞳子冷金玉版
廷珪事皆東坡說也

謝胡帥餉酥

虎頭骨相生來無談天
吻燥齋腸枯欲從底處覓膏潤
凝香燕寢烹牛酥鵝兒黃拂冰肌膚關中穰下遠不如
已令炊餅作十字今晨盛饌非伊蒲

謝柳全叔縣丞寄高麗松花

幽人所住空山裏老松皆作蚪龍起
但知樹底聽松風不見風前落松子
三韓華萼手自開其間瑣碎如嬰孩

請因賈客詔君長二十餘年無使來

鹽甕酒

辛未歲

吳儂餅麴成村酒所取何嘗議升斗一栢未盡朱顏酤
過若茅柴那得久官酤私釀同一律竟識吾家新醞否
近持方法報山妻入眼從來未曾有舊時菽麥真其父
秫稻麥和以爲母東坡酒子賦米為母麴為父甕頭又戴老瓦盆
塞四旁如戶牖數朝已辦糟牀注不論清濁皆可口欣
然一笑謂山妻慎勿輕傳殆天授答云妙處須心得縱

有此方無此手請君痛飲當解醒賢哉大勝劉伶婦

蓮榭

郎官一星幾時落乃在水遶山圍間幽亭野約不知數
青鞋庾菜何由閒眼前突兀見蓮榭秋水泠然沼其下
凌波仙子襪生塵露冷風淒微月夜願公清淨如遠公
吾欲投合保社中冰雪肌膚敲翠蓋看花心似太虛空

遊張公洞

張公洞府未著腳向人浪說游荆溪欲看直上翠羽蓋

不惜扶下青雲梯勁風翻動土囊口暗水流出桃花蹊
卻將深處問兒輩一夕飛夢窮攀躋

禽聲

不如歸去東皋上美酒提壺迎婦餉何妨脫袴著新衣
百箔蠶絲繭如盎春泥滑滑未沒腰田間布穀初立苗
牧兒喜舞麥熟也報答爾曹婆餅焦

荷池

名園中有十頃池一錢不用君得之菱荷枯折小鴨睡

絕勝紅妝青蓋時蛙鳴莫作鼓吹想亦莫問屬官與私
讀書之暇招客飲能有此樂非公誰

次折仲古游潯州桂園韻

雞犬圖書同一舸老夫蕩槳兒扶柁潯江一繫欲生根
夢下湖南向江左極知越俗留連客性不相投如火
是誰招喚寫羈愁挂頰西山雲數朶雲山下有園五畝
不植側生旁挺果十年藝桂待芳辛歲晚風霜深印可
有懷澤畔入騷辭配以蘭椒真類我斧斤竟不赦孤根

問主林神安所坐乃知有用禍先集社櫟之徒最繁夥
徑須澆下魄磊胸乞取青錢供白墮

為張四明作

一生所聞張仲蔚閉門蓬蒿深幾尺邇來伐竹聲丁丁
手披榛叢待三益徑中踏破蒼苔色定是幽人芒屨跡
莫將車邊兩輪赤奪此千竿一池碧

時張有四
明之命

馮縣丞墨花

君持松煤與研滴慘澹不言生百物胸中自無俗子韻

落筆乃有此氣骨江梅正爾不施丹為我拂拭為清寒
一枝早晚到牕几定作月影橫斜看

錢生遺筇竹斑杖戲作

筇山美竹天下聞有客錢氏之初雲自言吾祖嫌杖晚
贈子九節斑斕文尋幽已得濟勝具傍險更策扶危勳

同行安用木上座

案此句本傳燈錄佛日禪師見夾山舉拄杖曰惟有木上座同行耳又見

蘇軾詩留我同行木上座原本木誤人今校改一日不可無此君

夏初示兒曹

鳥聲四合陰扶疎江湖散人拜賜初此君之子才墮地
一一文采如於菟相看又作故時面乃是秋風篋中扇
寸陰尺璧定何如付與爾曹分貴賤

玩鷗亭

乃翁獨步辭雲間五花判罷遊金鑾甘泉頗勞侍從事
夜直必夢江湖寬晚遭忌刻泛湘水衆為不樂公欣歡
白鷗無數沒浩蕩相親相近俄相安何曾一旦舞不下
始信前事盟未寒文章炳蔚冠當代衣被諸子猶班班

攜持扁榜向陽羨往日風味追令還乃翁閒散莫浪許
乃翁青紫當拾取回施佳名與老夫長共羣鷗臥煙雨
獨青亭

霜落水痕風落木翠蓋倚天惟汝獨是誰手種百年餘
蔭此空庭一株足歲寒不但色青青上有垂絲下茯苓
松根老僧應取此制人頽齡起人死

題壽樟亭

大屋連甍小容足棟宇以來非一木豫章不是十圍樗

受命于天何得獨君莫厭老大蓬蒿間應龍虹梁果非

福

案第三聯係長短句原本虹字下脫梁字攷西都賦抗應龍之虹梁詩蓋用其語今校補

虛堂書

靜聞丁丁溜雨枯皮在空谷

蚊蠅擾甚戲作

黑衣小兒雨打牕斑衣小兒雷殷牀良宵永晝作底用
只與二子更飛揚開尊七箸須一洗破卷燈火尤相妨
從來所持白羽扇自許百萬猶能當安知手腕為汝脫
以小喻大真成狂揮之使去定無策葛帳十幅眠空堂

朝喧暮闕姑聽汝坐待九月飛嚴霜

同鄭禹功登巾子山

天台鴈蕩天下奇豈不欲往官縛之巾山只在郡南郭
曾未著眼真成癡今晨排遣簿書了往赴鄭老同幽期
羊腸轉盡得蘭若飛鳥不到雲雨垂青銅鏡外翠屏遶
中有萬屋魚鱗差古來二事不兼得此地一覽俱無遺
蓬萊方丈果何許雲駕飈馭知為誰赤城風月幸好戲
驅取鸞鳳相追隨

茶山集卷三

欽定四庫全書

茶山集卷四

宋 曾幾 撰

五言律詩

立春

十載東都客
春盤種種春
翠看蔬甲
小黃愛韭苗
新流落成
吾老蕭疎
對此辰
睦隣如有
使傳語
大梁人

春日二首

今日知何日東風破臘來寒隨邊騎去春與漢軍回彩
勝參差翦蔬盤飮餽開不妨時節好年事豈禁催

期頤三萬日政爾亦無多佳節已如許衰年將若何雨
風增落寞戚友斷經過問訊庖廚內猶堪一洗磨

春日卽事次韻

穠李花如許殊勝灼灼紅只言開似雪不道去隨風勝
日從吾黨衰年念此翁詩情猶可強栝勺不能同

雨二首

秋冬久不雨氣濁喜雲生
麥隴崇朝潤茅檐徹夜聲
初來斷幽徑漸密雜疎更
賴有牆陰薺離離已可烹

薄晚初霑洒清晨更慘悽
魚寒拋餌去鴉濕就簷棲
幽澗濺濺溜長堤淺淺泥
一杯持自賀吾事在鋤犁

夕雨

屣履行莎徑移牀臥草亭
風聲雜溪瀨雨氣挾龍腥
暑空
中電昏昏雲罅星徂年又
如許吾鬢得長青

雨夜

一雨遂通夕安眠失百憂
牕扉淡欲曉枕簟冷生秋
畫燭爭晷道金尊數酒籌
依然錦城夢忘卻在南州

仲夏細雨

霖霖無人見芭蕉報客聞
潤能添硯滴細欲亂爐薰
竹樹驚秋半衾裯愜夜分
何當一傾倒趁取未歸雲

憫雨

梅子黃初徧秧鉞綠未抽
若無三日雨那復一年秋
薄晚看天意今宵破客愁
不眠聽竹樹還有好音不

郡中迎懷玉山應真請雨得之未霑足

憫雨連三月為霖抵萬金小垂開士手足慰老農心果
欲千倉積猶須一尺深病夫渾不聽危坐聽佳音

蘇秀道中大雨

梅雨又時雨蘇州仍秀州客行無六月農事有三秋雲
氣深鴻鴈烟波沒白鷗衰年慚愧汝物役幾時休

晚雨

蕭瑟度橫塘霏微映繚牆壓低塵不動洒急土生香聲

八楸梧碎清分枕簟涼回頭忽陳迹簷角掛斜陽

久雨

荒院已無趣愁霖終不開簷聲喧客語屋漏逐人來
橋報今朝斷牆聞昨夜摧尚餘湯餅具積潦未為灾

久雨有懷曾宏甫

欲訪溪山老無如此雨何一春判棄置十日斷經過
燈火相看放鶯花卽漸多晴暄如有意數數上南坡

苦雨

儘道迎梅雨能無一日晴
牕昏愁細字簷暗亂疎更未
怪蛙爭席真憂水冒城何由收
積潦簫鼓賽西成

大暑

赤日幾時過清風無處尋
經書聊枕藉瓜李漫浮沈
蘭若靜復靜茅茨深又深
炎蒸乃如許那更惜分陰

謝人送壑源絕品云九重所賜也

三伏汗如雨終朝沾我裳
誰分金掌露來作玉溪涼
別甌輒炊飯小爐深炷香
麴生何等物不與汝同鄉

別甌
炊香

飯供養于此
人禪家語也

大熱欲過廣壽寺謁韓子蒼追涼先之以詩

執熱今如此追涼定若何
長廊受風遠廣殿得陰多
盛欲扶筇去還能下榻
磨近公如玉雪未厭數經過

病中聞鶯啼

獨園森古木其下客幽棲
盡日綠陰合有時黃鳥啼
一聲添晝寂百轉使人迷
賴汝生佳聽身今氣慘悽

病起贈曾宏甫

同病仍同起無聊獨至今酒杯君入手藥裏我關心極
暑方無奈新涼又不禁呼兒鋤徑草萬一故人臨

蛺蝶

不逐春風去仍當夏日長一雙還一隻能白或能黃
戀不能已翩翩空自狂計功歸實用終自愧蜂房

螢火

渾忘生朽質直擬慕光輝解燭書帷靜能添列宿稀
當風方自表帶雨忽成微變滅多無理榮枯會一歸

讀書

散帙有佳趣俗人那得知醉鄉非為酒坐隱不關棋
淨幽懷愜聰明老眼宜一生無用處又把教羣兒

乞筆

市上無佳筆營求亦已勞護持空雪竹束縛欠霜毫
此物藏三穴須公拔一毛不堪髯主簿取用價能高

題雙巖堂

老子徜徉地岩幽想像間綠陰城角路青嶂屋頭山
薄

領惟生睡壺觴不解顏使人留眼處龕壁字回環

泉石堂

南坡佳絕處夏木晝成陰青壁可對面寒泉能醒心
駕言同勝踐晤語契幽襟野興何曾盡林間棲暮禽

第五句一

云從游
無俗物

坐進堂

茅宇淨掃地竹爐深炷香一枝藤倚壁六尺簟敷牀
門掩人聲寂簾垂晝景長跣趺便終夕端不負茲堂

參雲亭晚坐

大暑不可避微涼安所尋
雲霄非濁世竹樹有清陰
海近風先集山高日易沈
無因見明月螢火亂更深

龍溪新亭

不識梯山路今聞駕壑橋
蛟龍深窟宅松竹半雲霄
與子成二老由來非一朝
崖藤如暫寄還往肯辭遙

雪中次韻

積雪何所待凍雲終未開
有時聞瀉竹無路去尋梅
只

欲關門臥誰能蕩槩來辟寒須底物正乏麴生才

負暄

炙背茅簷日雖貧辦不難趙衰真可愛范叔一何寒書
暖無遺索書明得細看羲和有底急薄暮更衣單

次韻三首

白日無偏照玄冥不作難有爐如許大無地可言寒書
腹黃緣曬禪心邂逅看呼兒來共此形影未孤單

御冬無過酒得酒政應難可愛惟晴日相依度歲寒雖

非挾纊坐且作擁爐看飢亦何堪忍斜陽掛食單

鑿土篝松火為爐有底難未知行地日可辟中人寒氣
味醇醪似光陰尺壁看回頭長夏景直欲褫中單

晁園

入春欲攜家一遊
晁園淫雨竟不果

晁氏芳菲圃因依淥水潯峯巒春著色桃李畫成陰可
惜花狼籍仍遭雨滯淫饒陽供客眼只有此園林

次朱新仲待制見慶次對之命韻

典郡才能薄趨朝氣力微更堪持橐去只合掛冠歸六

閣麗千尺四松森百圍公今有班綴衰老借餘輝

唐待制班

在四松之間

次劉千歲喜折仲古見過二首韻

新知劉子政生理髮蕭疎勝日歸談笑佳山奉起居
摩挲千古物料理一牀書秀色堪餐否聊須摘我蔬

門對分流水牕橫別岸山茅茨居不翦蓬華晝常關
傾蓋曾三徑搖旌每數間猶欣龍閣老攜得好詩還

次曾宏甫見過二首韻

客有過蘭若交情似竹林野花無可落村酒不宜斟又
得清新句如聞磬款音南坡盟好在為問幾時尋

鶯啼花落後芳草綠陰初良會日不足清談風有餘飢
餐聊當肉嬾出生無車勿以貧兼病相過跡也疏

次鎮江守曾宏甫見寄韻

一別高明去頻為瘴癘侵連滄公境界橫碧我山林夜
雨思同夢秋風辱寄音他年如衣錦畢世莫分襟

次曾宏甫見寄韻

今晨尺書至令我寸心寬老去光陰速人生會合難竹
興雲洞暖釣艇玉溪寒小憩饒陽否吾衰合掛冠

又

剖符舒子國蠟屐皖公臺恨不從山簡欣然見老萊

甫宏

子表勲持
詩以來

功名身已老交舊首空回早晚依劉去朝廷

不乏材

又二首

一紙寢丘書僧牕屢卷舒無因浮左蠡況復度匡廬政

以相望遠非關自作疎夢成飛鳥去千里不躊躇

政喜溪南宅

宏甫卜築溪南

還乘剡縣船

予將適越上

歸來知底日

老去惜餘年觴詠雖休矣音書未寂然省郎君舊物消息已真傳

次曾宏甫赴光守留別二首韻

聽說光州好淮山是四隣凝香無一事奠枕有餘民世

以文章著朝須寵數頻西湖便歸去應不待班春

案班春二

字不經見攷後漢書崔駰傳駰祖篆王莽時為建新大尹到官稱疾不視事門下掾倪敞諫乃强起班春此詩蓋本之

淮白美無度山丹開欲然談誇空海內悵望只溪邊
老境嗟無幾宗盟幸有連到時能走送別後見相憐

五月六日為叢珍之集于南池呈座中諸公

今日攜壺地南池信杖行紅蕖爭入眼白鷺最關情待
得跳珠雨來聽打葉聲菰蒲最深處只欠小舟橫

公廨蓮池

浪說吾邦小清池思有餘水風涼枕簟荷氣馥衣裾客
位經過少官曹簿領疎良辰不行樂秋水落芙蓉

題方氏清芬閣用范文正公韻

勝絕登臨地
桐江占十分
省郎才不世
御史氣如雲
遂使芝蘭秀
俱能錦繡文
諸孫又如許
百代有清芬

效諸生作雪中探梅

野梅消息近
踏冷訪林端
東閣尊空蒲
南枝雪半殘
疎條未禁笑
真態欲欺寒
後夜花應好
仍勤束火看

嶺梅

蠻烟無處洗
梅蕊不勝清
顧我已頭白
見渠猶眼明
折

來知韻勝落去得愁生坐久江南夢園林雪正晴

巖桂二首

擢本千巖秀開花八月涼雖非傾國色要是惱人香
籬下菊清好林間蘭靜芳可憐遭遇晚妙語欠蘇黃

栗玉黏枝細青雲翦葉齊團團巖下桂表表木中犀
江樹風蕭瑟園花氣慘淒濃薰不如此何以慰幽棲

種竹

近郊蕃竹樹手種滿庭隅餘子不足數此君何可無
風

來當一笑雪壓要相扶莫作封侯相生來鄙木奴

二兒次韻予亦復次韻二首

此君今日醉不復記方隅窈窕因吾有恢台到爾無青
猶須雨沐直不要人扶旁舍連高柳何堪與作奴
幽居有忙事為竹遶牆隅雨後青蔥否風前安穩無井
深時汲引架倒復持扶只欠江梅樹君應壻玉奴

新種竹有筍

此君非俗物今歲有佳兒徑密無人見僧來報客知西

家應滿地上番欲橫枝添得清聲未君聽風雨時

竹軒出筍

問訊東軒竹新萌頗不齊文章藏霧豹頭角觸藩羝逸
氣先騰上長鞭半落西後來堪底用采掇付山妻

似賢齋竹

大暑不可度小軒聊復開只消看竹坐不必要風來豈
待迷時種何妨臘月栽葉端須雨打有句索渠催

所種竹鞭盛行

獨遠簷簷徑令人喜欲顛已持蘇老節更著祖生鞭傍
舍應除地新梢擬上天真成時夜卯煨茁想明年

逮子作亭于官舍明清堂後種竹殆千竿余名其
亭以留客取老杜竹深留客處之句因題二小詩
云

行到竹窮處有亭佳可遊境因吾子勝客為此君留娟
淨經時雨蕭梢六月秋豈無他草樹涇渭不同流

種竹無他事林間與客遊自應攜手入安用閉門留靜

可過僧夏清宜對奕秋衰翁九節杖來往亦風流

代書抵筠守譚崧老求茶筍

問訊江南美人推道院州雨前收雀舌雪底薦貓頭有
客同僧過頻年遣僕求故交今五馬解送老龐不

南歸題揚州竹西亭

往歲出蕪城飄然一客星又從江北路重到竹西亭楚
岸寬圍碧吳山遠借青聖時還舊觀歌吹月中聽

登揚州郡圃小金山遙碧亭

絕島浸中零

案中零二字似應從泠攷一統志中泠泉在鎮江西北煎泉水記劉伯芻以揚子江

南泠水為第一泠或作零亦作霑今仍原文

飛來棗葉輕碧天圍斗野紅日

下蕪城山作脩眉翠人添老眼明園林多勝地獨愛小

崢嶸

高郵無梅花求之于揚帥鄧直閣

送臘臘垂盡迎春春欲回如何萬家縣不見一枝梅有

客幽尋去無人遠寄來揚州何遜在政用小詩催

鄧帥寄梅并山堂酒

甕社湖邊路詩筒得報回舊時雲液酒

揚州上新名也

新歲雨

肥梅不是園官送真成驛使來鬢毛都白盡更著此花

催

謁徑山佛日杲禪師于虎丘

此老雲相似何天不往還打包龍井寺持鉢虎丘山一

別經年事相逢半日間向來參底語不墮有無間

師示余以

狗子無
佛性語

遊虎丘寺

重遊吳子國又入虎丘山長日挽人住好風將我還兒

童陪勝踐長老記衰顏

長老沼公嘗邂逅于三衢

無復尹和靖西菴

空掩關

余二十年前嘗到此山中是時和靖寓居西菴

留別榮茂實侍郎

老為吳會客耆舊不相忘政以牛馬走曾陪鵷鷺行千
年書穴在六月鏡湖涼從此登臨地回頭憶侍郎

寓廣教僧寺

似病元非病求閒方得閒殘僧六七輩敗屋兩三間野

外無供給城中斷往還同參木上座與汝住茶山

嶽麓寺

嶽麓知名寺幽尋到眼邊林深不見日山靜只聞泉便
欲呼舟去聊為借榻眠明朝遊歷處都在小牕前

嶺外出巡

嶺外身逾老江南首重回有猿啼夢破無鴈寄書來山
雨晴猶濕蠻烟晝不開如何緣許事奪我手中杯

南雄郡守致怪石四株

只道無南鴈書今數往還一牕江表地數朶廣東山奇
甚君風骨蒼然我面顏歸時要船重更為斲岩間

何德器寄道州怪石

一去春陵郡天星幾度回身今鏡湖住山自道州來指
點雙巖出摩挲一笑開是誰營致此石友似陳雷

太湖石

誰憐孤峭質移在太湖心出得風波外任他池館深不
同花逞豔多愧竹垂陰一片至堅操那憂歲月侵

怪石

濟勝初無具搜奇只此間飛來太湖石坐我洞庭山面
面成腮戶峯峯出髻鬟寓居端欠此頗欲載之還

聞寇至初去柳州

剝啄誰敲戶倉皇客抱衾只看人似蟻共道賊如林兩
岸論千里扁舟抵萬金病夫桑下戀萬一有佳音

聞寇退欲還柳州寄柳守常子正

舊隱龍城在書傳喜可知還來避地客已去弄兵兒瘴

色休看鏡行期不問龜中秋一杯酒定與故人持

大藤峽

一洗千戈眼舟穿亂石間不因深避地何得飽看山江
潰重圍急天橫一線慳人言三峽險此路足追攀

歸途

歸途似烏鵲得樹且依棲一寸客亭燭數聲村舍雞路
長風正北野曠日沈西夢作祠官去江干入馬蹄

自廣西歸上饒閱所藏書

久矣山人去懷哉屋壁藏侵陵閱梅雨調護乏芸香次第繙經集呼兒理在亡乞歸全為此何愛橐中裝

初還信州呈寓居諸公

萬事不稱意一生長損心稍知閒有味又覺老相侵田舍那能問溪山未暇尋清歌一杯酒聊與故人斟

呂郎治先以職事至常山縣不敢越境以書致兩郡酒日鑄茶

子到常山縣饒陽有敝廬相望百里地空得數行書睡

思茶料理愁懷酒破除新秋卽在眼過我定何如

治先許秋

間攜家
見過

迪姪屢餉新茶二首

吾家今小阮有使附書頻喚起南柯夢持來北苑春顧
余多下駟況復似陳人不是能分少其誰遣食新

勑廚羞煮餅掃地供爐芬湯鼎聊從事茶甌遂策勲興

來吾不淺送似汝良勤欲作柯山點

俗所謂
檮點也

當令阿造

分造姪妙
于擊拂

造姪寄建茶

汝已去閩嶺茶酒猶粲然買應從聚處

姪居三衢俗言所出不如所聚

寄不下常年洗滌盧仝椀提攜陸羽泉

予所居茶山泉名

無人

分得好更憶仲容賢

述姪餉日鑄茶

寶勝自不乏山芽安可無子能來日鑄吾得具風爐夏
木轉黃鳥僧牕行白駒談多轉生睡此味正時須

曾同季餉建溪顧渚新茶

雨潤梅黃後風薰麥秀初不持新茗挹空枉故人書顧
渚瓊糜似閩溪玉食餘吾宗重盟好併以遺閒居

尹少稷寄顧渚茶

駸駸要路津舊日水南人尚記茶山老能分顧渚春江
淮勞廟算河路暗胡塵憂國惟生睡降魔固有神

嘗建茗二首

破除湯餅睡倚賴建溪春往日惟求舊今朝遽食新不
辭濃似粥少待細于塵寶胯無多子留須我輩人

茅宇已初夏茶甌方早春真成湯沃雪無復渴生塵有
客朝三韭其誰送八珍不如藏去好孤負一年新

煎茶

貧中有佳設石鼎事煎烹顧渚草芽白惠山泉水清酌
多風可御薰歇霧猶橫飲罷妻孥笑枯腸百轉鳴

鄭侍郎招賞瑞香感舊有作

鄭驛留賓處看花又一年香囊依葉密錦繖向人圓子
敬新游岱吾宗復在邊小詩相促迫感舊一棲然

去歲
與王

元渤曾宏甫同
作詩故有此句

榴花

樹陰看已合榴朵見初明
當夏豈無意避春真有情
花雖後文杏實可待瓊
橙病叟緣何喜留苔看落英

九日小圃菊花有開者
病瘍不能泛一栢把玩而
已

黃菊開何許疎籬小隱家
似知重九日故放兩三花
病著栢無淥衰年髮半華
佳辰辜負汝滿把但成嗟

宮祠滿秩

雲水天台郡祠庭我所監幾年真傲吏今日是前銜
祿米誰周急園蔬不療饑上書端未免定不達空函

送曾宏甫守天台

此地多朋好惟君似弟兄不堪輕作別那得易為情
秋日行灘水春風上赤城莫言無過鴈略不寄佳聲

送戚弼甫解官鹽場二首

聽說君中外交堂世上名文華張右史

君之外祖也

正素老

先生已上三年課相期萬里程贈行無好句聊用一杯傾
訪舊今無幾惟君昔有連笑談傾一坐筆札富諸賢
君蓄前賢墨蹟甚富作惡又數日從游經二年勉旃繩祖武窮達自

關天

送李商叟

好去皇華使佳哉所領州職除天祿閣家近岳陽樓一
別誰青眼相逢各白頭西來多驛騎能寄短書不

送紹興張耆年教授之永嘉學官

海內孤寒士江頭獨冷官胡為涉脩阻不肯近長安
蠲紙無留筆生枝不帶酸名山天下少行矣雪消殘

送洪州西山香城長老通公惠通

間說香城寺孤峯靉靄間公今懷祖印老去入鄉關
通人也穩泛春波水深藏暮雨山筆頭多語句寄我不當慳

逮子赴湖南漕司舉寄之

舉子忙如此槐花細細開吾兒承詔去有客附書來
鶴髮風前帽雞頭月下杯衰年餘幾許勝日不同陪

逮子以今歲正月十六日之毗陵而以十二月十五日還舍銓試第二且得新雛以詩示之

不見吾兒久今朝慰眼前分襟燈火夜回權雪霜天中鵠令人喜將雛得我憐一杯歡笑後急急理塵編

挽李泰發參政三首

公昔遭前政忠精不少衰立談廷爭地上疏里居時意氣南山在名聲北斗垂心知不亡者送往得無悲

漢室推元禮唐家得衛公龍門傾後輩鯨海伏孤忠守

護多神物旋歸一老翁如何九江路萬事併成空
道義曾無間因依遂有連旋聞新雨露亟返舊林泉
父老門庭下兒孫几杖前不令成此段泣涕問蒼天

挽石參議

人物千巖秀家風萬石餘劉侯深愛畫杜氏富藏書
卿寺曾親擢藩方有詔除遽隨丹旆去老淚濺衣裾

挽焦適道寺丞二首

氣質推渾厚言談見切磋過從方里巷挽送忽山阿
吉

士今如此高穹定若何交游雖不乏耆舊已無多

豈意初秋事俄聞遠日期在公無可憾有客不勝悲宅
兆溪山好郊原草木衰給孤園上路無復往還時

挽陳丞相

身已棲巖壑公初冠廟堂奉祠方德庇次對復恩光政
爾為舟楫如何壞棟梁縈緲爭點筆哀謝獨難忘

挽梁元功諫議

豈弟更三郡題評冠一鄉繩愆御史疏補闕諫臣章直

歎牙絃絕明嗟魏鑑亡皇情應震悼追賁盛龍光

挽程伯禹尚書三首

誠明猶博學直諒更多聞休父中興傑宣王上聖君精
忠自金石感會合風雲不謂生芻蕘今來下馬墳

壁水三千士文闡第一人煌煌持紫橐疊疊逼鴻鈞得
郡還辭劇居家更乞身期頤如可料愁絕上元春

昔在宣和日雍容接俊游橫經臨壁沼提榘上瀛洲去
德俄千里依仁復兩州豈知垂老別華屋落山丘

挽王元渤舍人二首

早得文章譽仍高政事科珠璣隨咳唾襦袴起謳歌老去貧逾甚歸來病更多善人今已矣施報果如何

觴詠陪真率言談見坦夷淒涼今日事牢落暮年悲有淚看詩卷無情對酒卮哀哉王子敬吾黨一何哀

挽鄧禹功

山海淮壖利吾徒職駿奔長官惟我在同事只公存句法深深見心宗細細論清風今已矣微月耿黃昏

挽向伯恭侍郎三首

忠義雲霄逼聲名日月懸劇談風滿坐傑作氣無前詩
酒今彭澤山林昔輞川不隨秋露盡家集燦成編

用舍行藏事如公世所難誰能奉香火直作掛衣冠國
論言猶在宸毫墨未乾一生無限好留與後人看

昔在兒童歲曾陪竹馬游鄉林叨共席泛宅幸同舟忽
忽三年別堂堂萬事休孤風亭下夢猶記曩時不

挽晁恭道侍郎二首

家令西京傑文元聖世賢大參名更重學士集爭傳此
道長回首惟公早比肩嗚呼百年半齋志遂沈泉

往日趨金馬中年剖玉麟論思貳卿事歌詠別都民久
矣窮諸妄歸歟一真東園尊俎地俯仰跡成陳

挽呂惇智

用中

直閣二首

呂卿豪傑士家世兩中公小試為郎日深知有祖風名
高中興後病著半生中遂作青山去嗚呼萬事空

歷數交游內公家雅有連舍人先卽世駕部復沈泉遠計聞

今夏高談記昔年離窮一片影大似老夫然
惇智昆仲
惟偉信在

耳

五言排律

戲同諸孫課春日遲遲

晝漏今多少人閒只自知簾垂春色靜窓度日華遲柳
影徐徐轉花陰緩緩移助成耕野事添得讀書時醉著
三竿睡憂來一局碁吾徒須愛惜看卽是冬曦

王履道左丞見訪

近市三椽屋斜陽一席門故人空厚祿過我獨高軒轉
刻求巾屨忘形奉笑言性容安石緩道許穆生存暝色
遙岑合歸途漲水渾傳呼聽已遠依舊雀聲喧

雪中登王正中書閣

對雪同誰語登樓似欲仙人家修月戶丈室散花天山
擁鉤簾外江橫隱几前寒深落鴈渚清集釣魚船扶病
從摩詰銷憂得仲宣展書明細字烹茗濕疎烟月好還
同夢詩成已下弦

是日既望後十日而詩始成

明年儻相憶一為到


關邊予有嶺南之行

秋雨排悶十韻

今夏久無雨從秋卻少晴空濛迷遠望蕭瑟送寒聲衣
潤香偏著書蒸蠹欲生壤簷聞瓦墮漲水見堤平溝溢
池魚出天低塞鴈征螢飛明暗廡蛙鬧雜疎更藥醖時
須焙舟閒任自橫未憂荒楚菊直恐敗吳杭夜永燈相
守愁深酒細傾浮雲會消散鼓笛賽西成

食蜂兒有感

蜂兒雖小物各自有君臣奪食已非義焚巢茲不仁殺
身緣底罪作俑定何人不憚高論直寧辭遠送珍解包
顏有喜入坐齒生津海錯休前列山肴且不陳其誰心
惻怛為汝鼻酸辛願下孩蟲令思傾雨露春



茶山集卷四